

# 陳明仁：拍賣老台灣m東門町記事

(桃紅字：表聲音內容)

Koh 來 這對枕頭

請出價，小等ii

睏過數十年 ê 恩愛

Guán 兄弟姊妹 lóng 來出世

Lín beh 出 juā tsē

來，聽詳細

這對舊枕頭

睏過大東亞戰爭

睏過二二八事件

孤枕難眠 ê 目屎

緊張驚惶 ê 歲月

睏過台灣 ê 歡喜 kap 心酸

Lín beh 出 juā tsē

Guán m̄ 是生理人

Guán 做夥走 tshuē 一種心情

會 tàng 聯接古早 kap 現代

親像這個時鐘

一直行，一直行

用熱情 ê 發條

行過台灣 ê 歷史

Guán 做夥走 tshuē 一種心情

會 tàng 聯接你 kap 我

親像這面梳妝鏡

褪色 ê 鏡花

猶原照著家己 ê 孤單

小等，慢且出價

時鐘 leh 行

鏡內 ê 紅顏

已經退色

青春需要啥物價 siàu

Tsiah 會 tàng 買--轉來

歷史愛付啥物代價

Tsiah 會 tàng 換做笑容

Thàu 風落雨 ê 暗暝

東門町全款夜色

Lán 透過互相 ê 寂寞

拍賣一種心情

台灣古老 ê 感情

好，請出價

這種感情一斤 juā tsē?